

Siunnersummut oqaaseqaatit

Oqaaseqaatit nalinginnaasut

1. Aallarniut

Suliassaqarfiiut agguataarnerat nutaaq, aamma Utoqqat illersuisuata politikkimut attuumassuteqanngitsumik pisinnaatitaaffiata patajaallisarnissaa tunngavigalugit Utoqqaat illersuisuat pillugu Inatsisartut inatsisaannut Utoqqaat illersuisuata allattoqarfianut tunngasut aalajangersakkat allanngortinnissaat pillugu siunnersuut saqqummiunneqarpoq.

2. Siunnersummi immikkoortut pingaarerit

Utoqqaat illersuisuata allattoqarfianut tunngasut allannguutissat marluk siunnersuutigineqarput.

Allannguut siulleq tessavoq, Utoqqaat illersuisuata allattoqarfiatut atuuffik Isumaginninnermut Aqutsisoqarfimmit isumagineqartarunnaarnera. Tamatumunnga taarsiullugu Utoqqaat illersuisuat nammineq allattoqarfeqalissaq, tamaalilluni Utoqqaat illersuisuata suliassai illersuisarfinni allani suliassat suliarineqartarneri assigalugit politikkimut attuumassuteqanngitsumik isumagineqartalissammata.

Utoqqaat illersuisuata allattoqarfia Isumaginninnermut Aqutsisoqarfip ataani inisisimanera pillugu nalilersuisoqartarnissaanik piumasaqaammik atorunnaarsitsineq allanguutip aapparaa, maannami Utoqqaat illersuisuat nammineq allamullu attuumassuteqanngitsumik allattoqarfeqalissaq.

3. Pisortanut aningaasaqarnikkut allaffissornikkullu kingunerisinnaasat

Utoqqaat illersuisuata politikkimut attuumassuteqannginnissaa qulakkeerniarlugu Utoqqaat illersuisuat namminerisamik immikkut allattoqarfeqassaaq kiisalu qitiusumik allaffeqarfissuarmut attuumassuteqanngitsunik ininik nammineq iniuteqassaaq.

Tassunga atatillugu Utoqqaat illersuisuata allattoqarfiani ulluinnarni suliassanik suliaqartartussamik sulisumik Utoqqaat illersuisuat atorfinitssissaaq aamma init pisariaqartinneqartut attartussallugit.

Taakku saniatigut suliassanut aalajangersimasunut suliamik ilisimasalinnik isumaginnittussanik piffissamut killilikkanik atugassaqartitsisoqarluni atorfinitssisoqartarnissaq pillugu aningaasanik immikkoortitsisoqarsimavoq, assersuutigalugu inatsilerinikkut aningaasaqarnikkullu misissueqqissaarinernik il.il. suliaqartartussanik.

Taakku saniatigut allattoqarfiup pilersinnissaanut, matumani allaffimmi pequtinik, qarasaasianik atortussanillu pisiortornissamut aningaasanik immikkoortitsisoqassaaq.

	<i>AIS2022</i>	<i>AIS2023</i>
Allattoqarfiup pilersinnera	0,1 mio. kr.	
Allattutut atuuffiup isumaginissaanut sulisoq ataaseq	0,5 mio. kr.	0,5 mio. kr.
Suliamik paasisimasalinnik killimmik piffissalikkamik atorfinitstsineq	0,25 mio. kr.	0,25 mio. kr.
Init attartornerinut, sillimmasiinernut, kiassarnermut il.il. atugassatut aningaasat immikkoortitat	0,2 mio. kr.	0,2 mio. kr.

4. Inuussutissarsiornermut aningaasaqarnikkut aamma aqtsinermi allaffissornikkut kingunerisinhaasat

Siunnersuut inuussutissarsiornermut aningaasaqarnikkut imaluunniit allaffissornikkut kinguneqassanngilaq.

5. Avatangiisinut, pinngortitamut inuillu peqqissusaannut kingunerisinhaasat

Siunnersuut avatangiisinut, pinngortitamut imaluunniit inuttaasut peqqissusaannut tunngasunik kingunerisassaqanngilaq.

6. Innuttaasunut kingunerisinhaasat

Siunnersuut innuttaasut inatsisitigut innarlitsaalineqartnerannik pitsangorsaassaaq.

7. Kingunerisinhaasat pingaarutilillit allat

Siunnersuut pingaarutilinnik allanik kingunerisassaqanngilaq.

8. Tusarniaaneq

Siunnersuut tusarniutigalugu piffissami 8. juli 2021-mit 22. juli 2021-mut tusarniaanerit isaaffianni www.naalakkersuisut.gl-imi tamanut saqqummiunneqarsimavoq.

Tusarniaanermut akissutit pilligit allakkiami tusarniaanermut akissutit misissorneqarput. Ilanngussaq 2 innersuutigineqarpoq.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

§ 9-mut, imm. 1-imut

Utoqqaat illersuisuata namminerisamik politikkimullu attuumassuteqanngitsumik allattoqarfissamik pilersitsinissaanut ingerlatsinissaanullu atugassanik aningaasanik immikkoortitseqqullugit aalajangersakkami Naalakkersuisut peqquneqarput.

§ 9-mut, imm. 2-mut

Allattoqarfik aqutsinermi allaffissornikkut suliaqassaaq aamma suliamut tunngasunik Utoqqaat illersuisuannut ikuuuttassalluni.

Tamatuma kinguneratut assersuutigalugu allattoqarfik Utoqqaat illersuisata sulineranut tunngasunik apeqqutinik akissuteqartassaaq, nalunaarusianik aamma ukumoortumik nalunaarusianik suliaqarnermut peqataasassalluni, kiisalu suliamik ilisimasaqarnertut qaffasissuseqartumik suliamut tunngasunik suliaqartassalluni assersuutigalugu oqaaseqaatinik, tusarniaavigininnernut akissutinik, tusagassiutinut nalunaarutinik il.il. suliaqarnermut ikuuuttassalluni. Allattoqarfik aamma utoqqaat atugarisaat pillugit ilisimasanik katersisassaaq, paassisutissanik ineriartortitsillunilu ingerlatsitseqqittassalluni, assersuutigalugu ilaqtariinnermut, isumaginninnermut, peqqissutsimut, aningaasaqarnermut aamma ineqarnermut pissutsinut tunngasunik.

§ 9-mut, imm. 3-mut

Allattoqarfiup annertunerusumik suliassai nalinginnaasumik aqutsinermi allaffissornikkut atorfillip suliassarigai naatsorsuutigineqarpoq. Taamaattumik ulluinnarni allattoqarfimmi atuuffimmik isumaginnittussamik Utoqqaat illersuisuat sulisussamik atorfinitssissasoq peqquneqarpoq.

§ 9-mut, imm. 4-mut

Utoqqaat illersuisuata pingarnerusumik pilersaarusrusinerata kiisalu missingersuutit periarfissaqartitsinerisa iluanni, matumanit avataanit aningaasalersorneqarneq aallaavigalugit suliassanut aalajangersimasunut suliamik ilisimasalinnik isumaginnittussanik piffissamut killilikkanik atugassaqartitsisoqarluni atorfinitssisoqarsinnaavoq. Suliassat tassaasinnaapput suliassaqarfinnik suussusiliinerit, misissueqqissaarinerit aamma ilisimatusarnerit il.il.

§ 9-mut, imm. 5-imut

Utoqqaat illersuisoqarfiata pisortani suliffeqarfittut Namminersorlutik Oqartussat qitiusumik allaffeqarfissuani atorfefqartitaasunut atugassarititaasut atuuttut suli malissagai piissusissamisoortutut isumaqarfigineqarpoq. Tamanna Namminersorlutik Oqartussat

suliffeqarfiutaanni tamani assigiinnik atugassaqartitsisoqarnissaq pillugu kissaatigineqartumik pingarnerusutut tunngavilersugaavoq.

Nr. 2-mut

Isumaginninnermut aqtsisoqarfiup Utoqqaat illersuisuanut allattoqarfittut atuunnera pillugu nalilorsorneqartarnissaa pillugu aalajangersagaq atorunnaarsinneqarpoq. Utoqqaat illersuisuat nammineq allattoqarfeqalissaaq. Taamaattumk aalajangersagaq una maanna atorunnaarpoq.

§ 2-mut

Siunnersuut ulloq 1. januar 2022-mi atuutilissaaq.

Ilanngussaq 1

Inatsisissatut siunnersuut inatsimmut atuuttumut sanilliullugu	
<i>Oqaasertalersuut atuuttoq</i>	<i>Inatsisissatut siunnersuut</i>
	<p style="text-align: center;">§ 1</p> <p>Utoqqaat Illersuisuat pillugu Inatsisartut inatsisaat nr. 37, 28. november 2019-imeersumi makkuninnga allannguiteqartoqassaaq:</p> <p>§ 9. Isumaginninnermut aqutsisoqarfik Utoqqaat illersuisuannut allattoqarfimmik isumaginnittuuvoq. Allattoqarfik aqutsinermi allaffissornikkut suliaqassaaq aamma sulihamut tunngasunik Utoqqaat illersuisuannut ikiuuttassalluni.</p> <p>1. § 9 imatut allanneqassaaq: ” § 9. Utoqqaat illersuisuata allattoqarfissaa pilersinneqassaaq. <i>Imm. 2.</i> Allattoqarfik aqutsinermi allaffissornikkut suliaqassaaq aamma sulihamut tunngasunik Utoqqaat illersuisuannut ikiuuttassalluni. <i>Imm. 3.</i> Ulluinnarni allattoqarfimmii atuuffimmik isumaginnittussamik Utoqqaat illersuisuati sulusussamik atorfinititsissaq. <i>Imm. 4. Imm. 4.</i> Suliassanik aalajangersimasunik isumaginnittussanik inunniq sulianik aalajangersimasunik isumaginnittartunik piffissamut killilikkanik atugassaqartitsisoqarluni atorfinititsisoqarsinnaavoq. <i>Imm. 5.</i> Allattoqarfimmii atorfillit atugassarisanut aamma atorfiniternut pissutsit sinnerinut, atorfinnerup nalaani pissutsinut soraarsitaanernullu tunngatillugit aalajangersakkanut, Namminersorlutik Oqartussat qitiusumik allaffeqarfiata ataani atorfeqartunut qaqugukkulluunniit atuuttunut ilaapput.”</p>
§ 16 <i>Imm. 2.</i> 2022-imi apriliip 1-ni nalunaarusiortoqarnissaa Naalakkersuisut isumagissavaat, tassani § 9 malillugu isumaginninnermut aqutsisoqarfimmii allattoqarfiup inissinneqarnera nalilorsorneqassalluni. Nalunaarusiapi naammassineqarnerata kingunitsianngua taanna Inatsisartunut ilaasortanut	2. § 16, <i>imm. 2</i> , atorunnaartitaavoq.

agguanneqarnissaa siunertaralugu, Inatsisartunut tunniunneqassaaq.	
	§ 2 Inatsisartut inatsisaat ulloq 1. januaari 2022-mi atuutilissaaq.

Tusarniaanermut akissutit pillugit allakkiaq: Utoqqaat illersuisuat pillugu Inatsisartut inatsisaata allanngortinnissaa

Siunnersuut piffissami 8. juli 2021 - 22. juli 2021-mi tusarniaassutigineqarsimavoq. Tamatuma saniatigut siunnersuut tusarniutigalugu piffissami tassani tusarniaanerit isaaffianni www.naalakkersuisut.gl-imi tamanut saqqummiunneqarsimavoq.

Aallarniut:

Tusarniaanermit akissutit teknikkikkuut kiisalu oqaatsitigut kukkunillit amigaatillillu allanik oqaaseqarfiginagit siunnersuummi aaqqinneqarsimapput. Tusarniaanermit akissutit missingiummi tigussaasunik imaqartut tamarmiutilugit issuarneqarsimapput, naalakkersuisoqarfimmillu oqaaseqaatit uingasunngorlugit allanneqarput.

Siunnersuut ukununnga tusarniaassutigalugu nassiunneqarsimavoq:

Naalakkersuisut Siulittaasuata Naalakkersuisoqarfia, Nunalerinermut, Imminut Pilorsornermut, Nukissiutinut Avatangiisinullu Naalakkersuisoqarfik, Aningaasaqarnermut Nunamullu Namminermut Naalakkersuisoqarfik, Ineqarnermut, Attaveqaasersuutinut, Naligiisitaanermullu Naalakkersuisoqarfik, Inuussutissarsiornermut, Niuernermut, Nunanut Allanut, Silallu Pissutaata Allangoriartorneranut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Peqqissutsimut Naalakkersuisoqarfik, Meeqnanut, Inuuusuttunut, Ilaqutariinnut Inatsisillu Atuutsitsinneqarnerannut Naalakkersuisoqarfik, Aatsitassanut Naalakkersuisoqarfik, Ilinniartitaanermut, Kultureqarnermut Timersornermut Ilageeqarnermullu Naalakkersuisoqarfik, Avannaata Kommunia, Kommune Qeqortalik, Qeqqata Kommunia, Kommuneqarfik Sermersooq, Kommune Kujalleq, Isumaginninnermi Naammagittaalliuuteqartarfik, Førtidspensionsklagenævnet, Inuit Pisinnaatitaaffii pillugit Siunnersuisoqatigiit, Inuit Pisinnaatitaaffiinut Institutti, Meeqqat Illersuisuat MIO, Peqatigiiffik Kalaallit Meerartaat, MIBB (Meeqqat Inuunerissut), Sorlak (Kalaallit Nunaanni meeqqat inuuusuttullu siunnersuisoqatigiiffiat), Inuit innarluutillit illersuisuat Tilioq, INOOQAT (Angajoqqaat ineriartornermigut akornutilimmik meerallit peqatigiiffiat), Nunatsinni Inuit Innarluutillit Kattuffiat, ISI (Kalaallit Nunaanni tappiitsut isigiarsuttullu peqatigiiffiat), KTK (Kalaallit Nunaanni Tusilartut Kattuffiat), Landsforeningen Autisme-mi Kalaallit Nunaanni immikkoortortaq, Kattuffik Utoqqaat Nipaat, Angajoqqaqatigiit (Angajoqqaat ADHD-ertunik aamma/imaluunniit autismeqartunik meerallit kattuffiat), Neriuffik Kattuffiat – Kalaallit Nunaanni kræftimut akiuiniaqatigiiffik, KNIPK (Kalaallit Nunaanni Innarluutillit Peqatigiiffisa Kattuffiat), Sugisaq (Tarnimikkut eqqarsartaatsimikkullu nappaatiillit ilaqutaasalu peqatigiiffiat), Kalaallit Røde Korsiat, Sulisitsisut, SIK, Aarhus Kalaallit Illuutaat, Odense Kalaallit Illuutaat, Aalborg Kalaallit Illuutaat, København Kalaallit Illuutaat.

Uku inatsisisatut siunnersuummut oqaaseqaateqarput:

KNIPK, Kommuneqarfik Sermersooq, Inuit Pisinnaatitaaffiinut Institutti, Sulisitsisut,

Peqatigiiffik Kalaallit Meerartaat, Inuit Pisinnaatitaaffii pillugit Siunnersuisoqatigiit, Tilioq aamma Qeqqata Kommunia.

Oqaaseqaateqarsimanngitsut:

KNIPK, Kommuneqarfik Sermersooq, Inuit Pisinnaatitaaffii pillugit Siunnersuisoqatigiit, Sulisitsisut aamma Peqatigiiffik Kalaallit Meerartaat.

Tusarniaanermut akissutit:

1. Inuit Pisinnaatitaaffii pillugit Siunnersuisoqatigiit

Inuit Pisinnaatitaaffii pillugit Siunnersuisoqatigiit Utoqqaat illersuisuat pillugu Inatsisartut inatsisaata allanngortinnissaanut missingiut tigusimavaat, imatullu oqaaseqaateqarpugut, neriulluta Naalakkersuisut tigulluarumaaraat.

Utoqqaat illersuisoqarfiata patajaallisaavigineqarnissaa anguniarlugu namminerisamik allattoqarfimmik pilersitsisoqarniarnera Inuit Pisinnaatitaaffii pillugit Siunnersuisoqatigiivisa aallaaviusumik pitsasutut isigaat.

Naak Utoqqaat illersuisuat pillugu Inatsisartut inatsisaanni nr. 37 28. november 2019-imeersumi (Meeqqat illersuisoqarfiat, Inuit Innarluutillit illersuisoqarfiat, Naligiissitaanermut Siunnersuisoqatigiit kiisalu Inuit Pisinnaatitaaffii pillugit Siunnersuisoqatigiit assigalugit) Utoqqaat illersuisoqarfiat inuit pisinnaatitaaffii pillugit inatsiseqartitsinermik suliaqarnissamik piginnaatitaasoq allassimangikkaluartoq, taakkuninngalu tunngaveqanngikkaluartoq, utoqqaat inuiaqatigiinni illersorneqarnerat siunnersorneqarnerallu inuit pisinnaatitaaffii pillugit suliaqarnertut Inuit Pisinnaatitaaffii pillugit Siunnersuisoqatigiivisa isumaqarfigaat.

Utoqqaat inuiaqatigiinni inuit allat assigalugit tunngaviusumik inuttut pisinnaatitaaffeqarput, matumani assigiinngisitsinermut illersorneqarnissaminntuut pisinnaatitaaffeqarlutik.

Taamaattumik Utoqqaat pillugit Inatsisartut inatsisaata (illersuisoqarfiit allat aamma Inuit Pisinnaatitaaffii pillugit Siunnersuisoqatigiit assigalugit) inuit pisinnaatitaaffii tunngavigalugit suliarineqarnissaa isumaliutersuutigisariaqarpoq.

Assersuutigalugu Naalagaaffiit Peqatigiit aningaasaqarnermut, inooqatigiinnut tunngasunut kulturikkullu pisinnaatitaaffiisa naqissuserpaat inuk kinaluunniit inummut namminermet ilaqutaminullu naleqquttumik inooriaaseqartariaqartoq, matumani atisaqarnissamut aamma ineqarnissaminut inooriaatsip ingerlaavartumik pitsanngoriartortinneqarnissaanut pisinnaatitaaffeqarluni. Tamanna aamma innuttaasunut utoqqarnut atuuppoq.

Utoqqaat illersuisoqarfiat inuit pisinnaatitaaffiinut instituttimut assingusutut isigigaanni, taava Naalagaaffiit Peqatigiit nunani inuit pisinnaatitaaffiinut instituttit pillugit Parisimi tunngavissiaat, aamma Inuit Pisinnaatitaaffii pillugit Siunnersuisoqatigiivinut Inatsisartut inatsisaannut tunngaviusut, isumaliutersuutinut ilaatittariaqarput. Naalagaaffiit Peqatigiit

nunani inuit pisinnaatitaaffiinut instituttit pillugit Parisimi tunngavissiaanni suliffeqarfiiut pisariaqartumik politikkimut attuumassuteqanngitsuunissaasa qulakkeerneqarnissaat ilaatigut pineqarpoq, aamma suliffeqarfiiut oqartussanut attuumassuteqaratik suliaminnik ingerlatsinissaat pillugu aningaasalorsorneqarnissaat qulakkeerneqartariaqartoq pineqarluni.

Akissut: Ilanngunneqanngilaq

Utoqqaat innuttaasut ataaqqinartumik inuuneqarsinnaatitaapput aamma Naalakkersuisut Naalakkersuisoqtigiinnissamik isumaqatigiissutaanni 2021-meersumi tamanna qitiutippaat.

Utoqqaat illersuisuat pillugu Inatsisartut inatsisaat nr. 37, 28. november 2019-imeersup akuerineratigut Inatsisartut Naalagaaffiit Peqatigiit isumaqatigiissutaat aallaaviginagu nalunaarutigaat.

Utoqqaat illersuisuat pillugu Inatsisartut inatsisaanut oqaaseqaatinit:

“Maannamut, Inatsisartut inatsisaat nr. 11, 22. november 2011-meersoq naapertorlugu Meeqqat illersuisuannik pilersitsisoqarsimavoq, aamma Inatsisartut inatsisaat nr. 1, 29. maj 2017-imeersoq naapertorlugu Inuit innarluutillit illersuisuannik pilersitsisoqarsimavoq. Inatsisit taakku marluk Naalagaaffiit Peqatigiit meeqqat pisinnaatitaaffii pillugit aamma inuit innarluutillit pisinnaatitaaffii pillugit isumaqatigiissutaannit aallaaveqarput. Illersuisoqarfittut aaqqissuussat taakku marluk Utoqqaat illersuisuannik pilersitsinissaq pillugu matumani siunnersuummut isumassarsiorfiusimapput, kisianni Utoqqaat illersuisuannik pilersitsineq Naalagaaffiit Peqatigiit isumaqatigiissutaannik aallaaveqanngilaq.”

Utoqqaat illersuisoqarfiat inuit pisinnaatitaaffiinut instituttimut assingusutut taaneqarnera akuerineqarsinnaanngilaq, taamaattumillu Parisimi tunngavissiat atuutsinneqanngillat.

Tamatumunnga atatillugu tusarniaanermut akissummi uani pineqartut marluk erseqqissaavigerusuppagut:

- a) Utoqqaat illersuisoqarfata nammineq allattoqarfianik pilersitsineq politikkimut attuumassuteqannginnermut alloriarneruvoq pitsasoq. Taamaattorli Utoqqaat illersuisuata Naalakkersuisunit toqgarneqartarnera soqutigisaqarfiiit akuleruutinneqarnerannut takussutissaavoq, aamma Parisimi tunngavissiat malinneqanngillat – toqqaasarneq minnerpaamik inatsisartuniittariaqanngilaq soorlu aamma Inuit Pisinnaatitaaffii pillugit Siunnersuisoqatigiivinut tamanna atuuttoq. Tamanna aamma Meeqqat Illersuisuannut aamma Inuit Innarluutillit illersuisuannut, kiisalu aligiissitaanermut siunnersuisoqatigiit ilaasortaannut tunngavoqq, sulimi Naalakkersuisunit toqgarneqartarput – nakkutilliineq pillugu sullitassamminnit.”

”b) Utoqqaat illersuisoqarfianut aningaasat immikkoortinneqarsimasut katillugit qanoq annertugissanersut tusarniutigineqartuni aamma inatsimmut allannguutissatut siunnersuummi erseqqisumik allanneqarsimanngillat. AIS 2021-mi takuneqarsinnaavoq maannamut ukiumut Utoqqaat illersuisuannut 800.000 koruunit aningaasaliissutaasimasut. Allannguutissatut siunnersuummi pilersitsinermut aningaasartuutissat 100.000 koruuniussasut allassimavoq kiisalu allattoqarfittut atuuffiup isumagineqarnissaanut allanik 950.000 koruuninik tapiisoqarsimalluni, aamma ukiumut missingersuusiorfimmi siullermi. Kisitsisit taakku ataatsimoortinneqassappat aamma Utoqqaat illersuisoqarfiata allaffik atatiinnarsinnaagaa, aamma suut tamaasa minnerpaamillu piffissaq tamaat atorfillit ukiumut 200.000 koruunit atorlugit ingerlasinnaasoq Naalakkersuisut naatsorsuutigivaat? Utoqqaat illersuisoqarfiata ingerlanneqarneranut annikippallaartunik aningaasanik immikkoortitsisoqarnissaa mianersoqqussutigerusupparput.

Akissut: Ilanngunneqanngilaq.

Siunnersuummi allassimasut aningaasartuutissat tassaapput Aningaasaqarnermut Inatsimmi aningaasaliissutaareersimasunut tapit. 2022-mi Utoqqaat illersuisoqarfianut katillugit 1,85 mio koruunit aningaasartuutigineqassapput.

Utoqqaat illersuisoqarfiata nammineq init sullivini ukiumut 200.000 koruunit atorlugit atatissinnaagaa naatsorsuutigineqarpoq.

Inuit Pisinnatitaaffii pillugit Siunnersuisoqatigiivi maanna ukiumut 915.000 koruuninik aningaasaliiffigineqartapoq, aningaasanut inatsit 2018-imi allanngortinneqarmat aamma siunnersuisoqatigii 2019-imi namminneq allattoqarfittaarmata qaffanneqarsimanngillat, kinguneratullu siunnersuisoqatigii suliassani inatsimmi aalajangersarneqarsimasut naammassillugit suliarisinnaasimanngilai. Assersuutigalugu uagut siunnersuisoqatigiinni suliaqarnerput aatsaat sammisat ukiut pingasut annertussusaannut atorfinitsitsinikkut, tassaasunik aqutsinermi allaffissornikkut sulisoq ataaseq kiisalu suliad pillugit ilisimasallit marluk atorfinitsinnerasigut aatsaat tamakkiisumik ingerlanneqalersimasoq Inuit Pisinnatitaaffii pillugit Siunnersuisoqatigiivisa nalilerpaat. Maanna ukiut tulleriit marluk aningaasaleeqqinnissaq pillugu qinnuteqartarsimanerput eqqaasitsisutigissavarput.

Utoqqaat illersuisuata inatsisaata allanngortinneqarnissaanut atatillugu Utoqqaat illersuisuatu Inuit Pisinnatitaaffii pillugit Siunnersuisoqatigiivinut siunissami qanoq attuumassuteqassanersoq isumalitersuutigeqqullugu kaammattuutigerusupparput. Ullumikkut illersuisut marluk allat kiisalu Naligiissitaanermut siunnersuisoqatigiivisa siulittaasuat Inuit Pisinnatitaaffii pillugit Siunnersuisoqatigiivinut aalajangersimasumik ilaasortaapput. Siunnersuisoqatigii ukiuni kingullerni Utoqqaat illersuisuatu siunnersuisoqatigii ataatsiminnerinut peqataanissaanut qaaqqusarsimavaat ataatsimeeqataasarneralu

iluarisimavarput. Sooq Utoqqaat illersuisuat illersuisoqarfittut kisiartaalluni siunnersuisoqatigiinni ilaasortaanngitsoq tupigusuutigaarput.

Akissut: Ilanngunneqanngilaq

Inuit Pisinnaatitaaffii pillugit Siunnersuisoqatigiivi pillugit inatsisiliorneq Peqqissutsimut Naalakkersuisoqarfimmit suliarineqartarpooq.

Naggataarutaasumik Naalakkersuisut siunissami ungasinnerusumi ineriertortitsinissaq pillugu qanoq ittunik pilersaaruteqarnersut aamma qanoq ilillutik inuit pisinnaatitaaffii pillugit suliassaqarfimmik patajaallisaaniarnersut apeqqutigerusuppara. Ullumikkut inatsiserpassuaqarpoq aamma suliffeqarfeqarluni tamakkiisumik imaluunniit ilaannakortumik inuit pisinnaatitaaffii pillugit piginnaatitaaffeqartunik. Suliffeqarfiiit siunnersuisoqatigiillu pioreersut imminnut ataqatigiissarinissamut pisussaatitaanngillat, taamaallaallu meeqqat illersuisuat aamma inuit innarluutillit illersuisuat kiisalu naligiisitaanermut siunnersuisoqatigiit siulittaasuat Inuit Pisinnaatitaaffii pillugit Siunnersuisoqatigiivinut ilaasortaallutik. Aaqqissuussaanikkut suliffeqarfiiit imminnut atanngillat. Tassa imaappoq inuit pisinnatitaaffi pillugit suliaqarneq immikkoortunit 4-5-init suliarineqartarput, suliatigut siunersieqatigiitqoqarneq ajorpoq aamma inuit pisinnaatitaaffii pillugit inatsiseqartitsinkut suliatigut tunngasutigut piginnaasanik pisariaqartinneqartunik ataatsimoorlutik ineriertortitsinnaanngillat.

Inuit Pisinnaatitaaffii pillugit Siunnersuisoqatigiivinut, inuit pisinnaatitaaffii pillugit suliassaqarfimmi ataatsimoorfittut inissisimasumut aamma suliatigut tunngasunik tamanik, utoqqaat inuttut pisinnaatitaaffii ilanngullugit isumaginnittussamut pissutsit ilungersunartorsiorfiupput, maannami aningaasaliissutaasartut suliatigut ilisimasalinnik atorfinitssinissamut naammanngimmata.

Inuit pisinnaatitaaffii pillugit suliassaqarfimmi suliatigut ilisimasallit piginnaasaannik ineriertortitsiffiussappata aamma patajaatsumik aqqissuussaalluartumik atugassaqassaqnerat anguniarlugu taamaalillutillu suliatigut tunngasutigut ilisimaqassusaat aamma suliad pillugit siunersieqatigiittarfeqarnissamik periarfissaat qulakkeerneqassappata suliffeqarfiiit tamarmik naammattunik aningasaliiffigineqarnissaat qulakkeerneqartariaqartoq, Utoqqaat illersuisuata pisariaqarluinnartumik politikkimut attuumassuteqannginnissaanut maanna siunnersummut ilanngunneqarsimasumut ilanngullugu Inuit Pisinnaatitaaffii pillugit Siunnersuisoqatigiivisa erseqqissumik kaammattutigerusuppaat. Taamaattorli illersuisoqarfiup annikippallaanik aningaasaliiffigineqarneratigut aamma piginnaatitaaffiisa erseqqinngippallaarnerisigut inatsimmi piginnaatitaaffianik kivitsisinnaanngitsumik sulifimmik pilersitsisoqarnissaa aammaarluta mianersoqqussutigerusupparput.

Siusinnerusukkut Naalakkersuisuusimasut inuit pisinnaatitaaffii pillugit ataatsimiitsitaliarsuarmik pilersitsinissamut Inuit Pisinnaatitaaffii pillugit

Siunnersuisoqatigiivisa tusarniaanermut akissutaat ilanngullugu nassiupparput, taannami maanna inatsisisamut siunnersuummut attuumassuteqartoq isumaqarfigaarput.

Tamatumunnga peqatigitillugu Naligiissitaanermut siunnersuisoqatigiit aamma Inuit Pisinnaatitaaffii pillugit Siunnersuisoqatigiivisa ukiumi siusinnerusukkut ataatsimoorlutik atuartartutut allagaat ilanngupparput.

Akissut: Tusaatissatut tiguneqarpoq.

Naalakkersuisut Naalakkersuisoqtigiinnissamik isumaqatigiissutaanni 2021-mi Kalaallit Nunaanni innuttaasunut tamanut, matumanit meeqqanut, utoqqarnut aamma inunnut innarluutilinnut pissutsit patajaallisaavigineqarnissaat kissaatigisimavaat. Taamaattumik illersuisoqarfiit ataasiakkaat suliffeqarfii aamma kattuffiit inuit pisinnaatitaaffiinik suliaqartut pingarnerusumik pilersaarusiunneqarnissaat qitiutinneqarumaarpoq.

2. Tilioq

Utoqqaat illersuisuata uani inatsimmut allannguummi politikkimut attuumassuteqannginnissaata qulakkeerneqarnera Tiliup pitsaalluinartutut isigaa. Utoqqaat illersuisa namminerisamik allattoqarfeqalernissaa assorsuaq pitsaavoq, kisianni aningaasaliissutaasut qaffanneqarsimasut Utoqqaat illersuisuata suliassaanut inatsisitigut aalajangersagaasimasunut kivitsinissamut naammannersut Tiliup apeqquserusuppa.

Utoqqaat illersuisuata suliassai Inuit Innarluutillit illersuisoqarfiata suliat suliarisartagaanut assingulluinarpot. Utoqqaat illersuisuata suliassai immaqa Tiliup suliassaatut annertutiginngikkaluarput, kisianni ilisimasanik paasisitsiniaanermut, inuiaqatigiinni ilisimasaqassusermik annertusaanermut, innuttaasunut sulianullu tunngasutigut suliaqartartunut aamma politikerinut allanullu siunnersuinermik ilitsersuinermillu suliassat assigiippot. Misilitakkagut tunngavigalugit oqarsinnaavugut taama sulineq inuit marluk sinnerlugit (Utoqqaat illersuisuat aamma sulisoq ataaseq) amerlanernik allattoqarfimmi suliassanik suliariinnittartussanik pisariaqartitsivoq. Utoqqaat pillugit suliassaqarfimmi qitiutillugit suliaqarfiusussat pingarutillet iluanni ineriartortitsinissamut suliniutinillu ingerlatsinissamut, kiisalu illersuisoqarfiup angalanissaanut utoqqarnillu oqaloqateqartarnissaanut akissaqarnissaq pisariaqartinneqarpoq. Tilioq Aningaasanut inatsimmit aningaasaliissutaasartut saniatigut suli aningaasaliiffigineqarnissamik qinnuteqartariaqartarpoq, naak Utoqqarnut illersuisumut aningaasaliissutaasartussanit uatsinnut aningaasaliissutaasaartut annertunerugaluartut. Tamanna tunngavigalugu Utoqqaat illersuisuat inatsit tunngavigalugu suliassaminik kivitsisinjaassappat taava allattoqarfik aalajaatsoq marluk sinnerlugit sulisilik qulakkeerneqartariaqartoq kiisalu paasisitsiniaanermut suliniutit ineriartortinnissaannut, utoqqaat naapittarnissaannut aamma innuttaasunik politikerinillu siunnersuisarnissaq inatsimmi aalajangersarneqarsimasoq qulakkeerneqassappata aningaasaqarnikkut periarfissaqartinneqartariaqartoq Tilioq isumaqarpoq.

Akissut: Ilanngunneqanngilaq.

Utoqqaat illersuisuat Meeqqat illersuisuattut aamma Inuit Innarluutillit illersuisuattut aqtsinermi allaffissornikkut suliassanik assingusunik pisussaaffilerneqarsimanngilaq. Taamaattumik aqtsinermi allaffissornikkut aningaasartuutit annikinnerussapput.

Tiliup siunnersuutigaa § 9 imm. 3. ima allanngortinneqassasoq ”Utoqqaat illersuisuata ulluinnarni allattoqarfittut atuuffimmut isumaginnittussanik atorfinititsisassaaq.”

Akissut: Ilaatigut ilanngunneqarpoq.

Naalakkersuisoqafiuup ukiup ataatsip annertussusaanut immikkoortitat allattoqarfieuup isumagineqarnissaanut naammattuusut isumaqarfikai. Siunnersuut allanngortinneqarpoq taamaalliluni Utoqqaat illersuisuat ataasiinnarmik sulisoqarnissamut killilerneqassanngimmat. Suliassat aalajangersimasut suliarineqarnissanut piffissami killilikkami atorfinititsisarnissamut periarfissaqarpoq.

Naggataatigut qallunaatut inatsimmi allassimasumut taarsiullugu Utoqqaat illersuisuata suiaassuseq eqqarsaatigalugu arlaannaannulluunniit atanngitsumik taaguuserneqarnissaa Tiliup kaammattuutigerusuppaan.

Akissut: Tusaatissatut tiguneqarpoq.

Illersuisoq atorfimmut taaguummut ilaavoq maannalu siunnersuummi allanngortinneqassanngilaq, kisianni pineqartoq pillugu siunissami sulinissami kaammattuut ilanngunneqarumaarpoq.

3. Qeqqata Kommunia

Qeqqata Kommuniata siullertut Naalakkersuisut inussiarnersumik kaammattorusuppaat kommuunit Naalakkersuisullu akornanni isumaqatigiissutigineqarsimasoq, minnerpaamik sapaatit akunneri tallimat sulinngiffeqarfiiit avataatigut tusarniaanerit ingerlanneqartarnissaat maleqqullugit.

Akissut: Ilanngunneqanngilaq.

Siunnersuut piffissami 8. juli 2021-mit 22. juli 2021-mut tusarniutigineqarsimavoq. Tusarniaassutini erserpoq Naalakkersuisoqatigiinnissamik isumaqatigiissut 2021 malillugu suliasssaqarfinnik allanngortiterineq pissutigalugu allannguutinik siunnersuut aaqqiinerusoq.

Naalakkersuisoqarfieuup Namminersorlutik Oqartussat sapaatit akunnerini tusarniaanissaq pillugu malittarisassai malippai, kisianni siunnersuutit annikitsuunerat

tamatumunngalu peqatigitillugu paasiuminartuunerat pillugit qaqtiguumissumik tusarniaanermut piffissarititasoq sivikillisissinnaavaa.

Utoqqaat illersuisuata illersuisoqarfiit allat assigalugit namminerisamik allattoqarfeqalertinneratigut kiffaanngissuseqalertinnissaai pillugu siunnersuut Kommunip iluarismaarpaa aamma ilanngullugu Naalakkersuisut illersuisoqarfiit tamarmik allattoqarfiisa immikkoortisimaneqarnissaannut isummatik allanngortissimmagait iluarismaarlugu. Illersuisoqarfiit immikkoortinneqarpata aamma suliassaqarfimmennik immikkut tamarmik ukkataqarpata inuiaqatigiinni eqimattat assigiinngitsut namminneq illersuisortik aqqutigalugu annertunerusumik sunniisinnaasartut kommuni isumaqarpoq.

Tamanna iluatsillugu kommunip Naalakkersuisut kaammattorusuppaai Utoqqaat illersuisuata allattoqarfia sineriammi inisinneqarnissaai pillugu eqqarsaatersuuteqaqqullugu, taamaalluni illoqarfinni allani suliffissaqarniarneq aamma ineriartortitsineq qulakkeerneqassammat.

Akissut: Ilanngunneqanngilaq.

Utoqqaat illersuisuat tassaavoq siunissami allattoqarfissap sumi inissisimanissaanik aalajangiinissamut pisinnaatitaaffeqartoq.

Taamaattorli Utoqqaat illersuisuata utoqqaat periarfissaannik soqutigisaannillu qulakkeerinninnissaminut siuarsanissaminullu atatillugu Meeqcat illersuisuati assigalugu arfinilinnik aalajangersimasunik allattoqarfimmmini naammattunik sulisoqarnissaminut, akerlianik siunnersuummi sulisumik ataatsimik aalajangersimasumik atorfekartussamut siunnersuutigineqartumut naleqqiullugu pisinnaatitaaffeqartoq kommunip uparuarusuppaai. Kommuni isumaqarpoq utoqqaat inuiaqatigiinni eqimattat allat assigalugit immikkut ittumik inissisimasariaqartut, aamma inatsimmi aalajangersarneqarsimasunik suliassanik aalajangersimasunik anguniagassanillu isumaginnittussamik atuutsitilertussamillu illersuisoqarfimmik patajaatsumik utoqqaat sullinneqartariaqartut.

Akissut: Ilanngunneqarsimannngilaq.

Utoqqaat illersuisuat Meeqcat illersuisuattut aamma Inuit innarluutillit illersuisuattut aqutsinermi allaffissornikkut suliaqarnissaminut pisussaatitaanngilaq. Taamaattumik aqutsinermi allaffissornikkut assingusunik aningaasartuuteqarnissamut pisariaqartitsisoqanngilaq.

Kommuni siunnersummut allanik oqaaseqaatissaqanngilaq.

Tusarniaanermut akissut aqutsinermi allaffissornikkut suliarineqarsimavoq.